

IV bob. Buxgalteriya hisobining oddiy shakli

17. Kichik tadbirkorlik sub'yekti faoliyatida buxgalteriya hisobi ob'yektlari hisobini oddiy shaklda yuritish uchun mazkur BHMSning [2-ilovasiga](#) muvofiq shaklda Moliyaviy-xo'jalik operatsiyalarini hisobga olish kitobi qo'llaniladi. Ushbu registr kitob ko'rinishida yuritiladi hamda tikilgan va raqamlangan bo'lishi shart. Moliyaviy-xo'jalik operatsiyalar hisobi hisobot yili davomida mazkur Kitobda qayd etib boriladi. Mazkur Kitobning so'nggi varag'ida «Mazkur Kitobda _____ varaq raqamlangan» deb yoziladi va kichik tadbirkorlik sub'yekti rahbari tomonidan imzolanadi va muhr bilan tasdiqlanadi. Varaqalar soni yozuv bilan ko'rsatiladi.

18. Mazkur Kitobda moliyaviy-xo'jalik operatsiyalari natijalari tegishli schyotlar bo'yicha Moliyaviy-xo'jalik operatsiyalarini qayd etish jurnalida keltirilgan ma'lumotlar asosida aks ettiriladi.

19. Moliyaviy-xo'jalik operatsiyalarini hisobga olish kitobida kichik tadbirkorlik sub'yektlari tomonidan qo'llaniladigan barcha schyotlar mavjud bo'ladi.

20. Moliyaviy-xo'jalik operatsiyalarini hisobga olish kitobi uning «20__yil ____dagi qoldiq» qatorida aktivlarning, majburiyatlarning va xususiy kapitalning har bir turi bo'yicha hisobot davrining boshida mavjud bo'lgan qoldiq summasini qayd etish bilan ochiladi. Aktiv schyotlar bo'yicha qoldiq ushbu schyotlarning debetida, passiv schyotlar bo'yicha qoldiq esa ushbu schyotlarning kreditida yoziladi.

Har bir qatorda tegishli buxgalteriya schyoti bo'yicha yozuvlar Moliyaviy-xo'jalik operatsiyalarini qayd

etish jurnalida qayd etilgan buxgalteriya yozuvlari (provodkalari) ma'lumotlari asosida pozisiya usulida xronologik ketma-ketlikda amalga oshiriladi.

21. Har oyning yoki chorakning oxirida kichik tadbirkorlik sub'yekti tomonidan o'z moliyaviy-xo'jalik faoliyatining natijasini aniqlash uchun Moliyaviy-xo'jalik operasiyalarini hisobga olish kitobida oy yoki chorak bo'yicha qoldiq chiqariladi.

22. Moliyaviy-xo'jalik operasiyalarini hisobga olish kitobida qayd etilgan aktivlar, majburiyatlar va xususiy kapitalni hisobga oluvchi schyotlar bo'yicha qoldiqlar 1-sonli shakl — buxgalteriya balansiga, daromadlar va xarajatlarni hisobga oluvchi schyotlar bo'yicha hisobot davridagi aylanma 2-sonli shakl — moliyaviy natijalar to'g'risidagi hisobotga o'tkaziladi.